



22140523



**CHICHEWA A: LITERATURE – STANDARD LEVEL – PAPER 1**  
**CHICHEWA A : LITTÉRATURE – NIVEAU MOYEN – ÉPREUVE 1**  
**CHICHEWA A: LITERATURA – NIVEL MEDIO – PRUEBA 1**

Friday 9 May 2014 (morning)

Vendredi 9 mai 2014 (matin)

Viernes 9 de mayo de 2014 (mañana)

1 hour 30 minutes / 1 heure 30 minutes / 1 hora 30 minutos

---

**INSTRUCTIONS TO CANDIDATES**

- Do not open this examination paper until instructed to do so.
- Write a guided literary analysis on one passage only. In your answer you must address both of the guiding questions provided.
- The maximum mark for this examination paper is *[20 marks]*.

**INSTRUCTIONS DESTINÉES AUX CANDIDATS**

- N'ouvrez pas cette épreuve avant d'y être autorisé(e).
- Rédigez une analyse littéraire dirigée d'un seul des passages. Les deux questions d'orientation fournies doivent être traitées dans votre réponse.
- Le nombre maximum de points pour cette épreuve d'examen est *[20 points]*.

**INSTRUCCIONES PARA LOS ALUMNOS**

- No abra esta prueba hasta que se lo autoricen.
- Escriba un análisis literario guiado sobre un solo pasaje. Debe abordar las dos preguntas de orientación en su respuesta.
- La puntuación máxima para esta prueba de examen es *[20 puntos]*.

*Lembani ndemanga pa nkhani imodzi yokha. Poyankha funsoli mugwiritse ntchito mafunso onse awiri amene aperekedwa.*

1.

### Amulalatira atsibweni ake

Mawuwa adamudzidzimutsa Katakwe ndi mkazi wake yemwe. Ngakhale mbalame zomwe zinkayimba tinyimbo m'mitengo yapafupi nazonso zinadabwa chifukwa zidakhala chete.

Pampando wa ndakhutagone pomwe adali, Katakwe adakhala tsonga. Naye mkazi wake adadzutsa mutu pamkeka womwe adagona pakhundu pake. Onse pokweza maso adaona kuti  
5 mwini mawuwo sadalinsu wina koma a Topitopi.

Malume a Katakwewo adatulukira ali mu jekete lothina ndi buluku la fuleya. M'kati adavala malaya ofiyira ndi tayo yayitali yomwe idatulukira palisani ngati lilime la nanzikambe. Poyamba jeketelo lidali loyera, koma panopa, ngati kuti linkatsatira mano a malumewo omwe adali othimbirira n'kachasu, lidali mtundu wakatondo.

10 M'dzanja lawo lamanzere mudali velemoti yakachasu. Paphunzi lawo lamanja adakolekapo chikwama chomwe mudasuzumira mabotolo atatu.

“Malume, mukufuna pereseyu atiyalutse kapena kutipha?” Katakwe adaphiphiritsa nkhani.

“Phu!” a Topitopi adalavulira pansi. “Pa awirinu, vuto lili ndi ndani? Iweyo kapena mkazi wakoyu?”

15 “Tsibweni, tamalankhulani motsitsa; pano mpalayini,” adapempha Katakwe. “Anthu akamva aziti chiyani?”

“Ndikufuna muchite manyazi kumene!” A Topitopi adayankha kwinaku akupsontha bibida uja.

20 Katakwe adapuma mozama nakweza manja ake. “Malume, nkhani ngati iyi tisakambirane panja ngati pano; tiyeni m'nyumbamo.”

Iwo adawatsatira awiriwo. Atalowa m'nyumbamo, mkazi wa Katakwe adawapempha kuti akhale pampando.

“Sindinabwere kudzacheza,” a Topitopi adakana kukhala pansi. “Chomwe ndikufuna kudziwa n'chakuti kodi pakati pa awirinu gocho kapena chumba ndani?”

25 “Palibe wosabereka,” adayankha Katakwe.

“Palibe wosabereka!” Adatsatira monyodola a Topitopi. “Nanga nsalu ya lekaleka ili kuti? Ana ali kuti? Anthu oti mwatha chaka opanda mwana n'kumati ndife obereka? Zadothi!”

Katakwe adaseka kwinaku akugwedeza mutu. “Malume ifeyo panopa tikulera. Tidzabereka tikatolera katundu pakhomo pano.”

30 “Zamkutu!” A Topitopi adatsutsa. “Munthu amalera alibiretu ndi mwana yemwe?”

“Tsibweni, tawonani m'mene mulili m'nyumba muno; mulibe chilichonse. Ifeyo tikufuna tikonzekere bwinobwino tisanakhale ndi...”

“Chete!” Adamudula malume akewo akutulutsa chibotolo n'kuchiyika patebulo. “Awa ndi mankhwala obereketsa. Muzikhutchumula, akachita thovu muzimwa. Katatu patsiku.”

35 “Malume...”

“Ndati chete!” Adazaza a Topitopi akutulutsa chibotolo chachiwiri kuchokera m'chikwama muja.

“Mtera uwu ndi nkondo kubedi. Mayi, usiku uliwonse musadalowe kuchipinda kukagona, muziwonetsetsa kuti mwamwa.”

40 Sadadikire kuti ayankhidwe, iwo adatulutsanso chibotolo chomaliza, natembenukira kwa katakwe. “Umu ndiye muli mutuwo; mthibulo. Mphwanga macheza asadayambike, uziwonetsetsa kuti wamwa muti umenewu.”

“Malume...”

45 “Osandisokeneza! Ikadutsa miyezi itatu mudzandiwonanso ndikutulukira,” a Topitopi adadukiza napanga chizindikiro ngati akucheka pakhosi pawo.

“Ndikadzapeza zinthu zizanasinthe, mudzadziwiretu kuti banja lathera pomwepo. *Finish*, lamara, lasira, limasile, latha!”

Popanda kutsanzika, iwo adatuluka momenyesa chitseko.

L Kadzitché, *Katakwe zaka 10* (2011)

- (a) Muli ndi maganizo anji pa za mikangano ya pakati pa mibadwo yosiyanasiyana ndipo kodi mkangano wasonyezedwa bwanji munkhaniyi?
- (b) Unikani momwe mlembi wagwiritsira ntchito luso losiyanasiyana polemba (monga kukambitsana) ndipo momwe lusoli lathandizira pa tanthauzo la nkhaniyi.

2.

### Kuli kwathu

Kukhosi kwaumaku ndili kwathu  
Likanafewetsa ndi thovu lokha  
Thovu losefukira, kuyenderera  
Chipanda cha mowa choyangatidwa bwino  
5 Uli pachiphaka, pankhokwe yedzekeke  
Ndi thovu likanafewetsa  
Kachipanda kachindimba kali:  
    Phi-phi-thi, phi-phi-thi, phi  
    Phi-phi-thi, phi-phi-thi, phi  
10 Phi-phi-thi, phi-phi-thi, phi  
    Phi-phi-thi, phi-phi-thi, phi  
Azimayi atatsetsetsera zilundu  
Zawo chambali apa, zingoli  
Akuvomerezana ndi azibambo  
15 Ena onse natsirira mang'ombe navina  
Inde ndi thovu nthuni  
Likanafewetsa kumero kwaumaku  
Thovu losefukira chipanda  
Thovu loziziritsa kukhosi  
20 Thovu losesa fumbi kuti  
Ukonkhe bwino moyera, kukhosi  
Kumveke libwidi  
Ndipo malovu ali mkamwa lengezuwa  
Ndi thovu la kaphala, ayi ndithu  
25 Bwenzi mgwidyo numveka bwino  
Kuli kwathu nsenga tikanatafunira  
Thovu la thikhwithikhwi lili  
Thwanithwani; kupenya oyimba ng'oma,  
    thi-thi-thi  
30 thi-thi-thi  
‘Akabango’ ndi mluzu zili pakamwa  
Koma kuno, ayi mbale, ngakhale  
Nsengwa zotafunira, kaya nthungululu  
Yokha ata! zingoli zimene ndi za wena,  
35 Kwina! Likhala thovu limene  
Ndi tinthubwithubwi, tophenima  
Ndi kamphepo kayepiyepi nanga  
Thovu lidzinga la sopo yamakaka

Jack Mapanje, *Akoma Akagonera* (1986)

- (a) Kodi mukuganiza kuti woyankhula m'dakatuloyi ali ndi maganizo anji pa za moyo wa kumudzi kwawo kapena wa kwa eni ndipo maganizo amenewa asonyezedwa bwanji m'ndakatuloyi?
  - (b) Unikani momwe mlembi wagwiritsira ntchito zithunzithunzi m'ndakatuloyi ndipo kuti zikuthandizira bwanji pa tanthauzo la ndakatuloyi yonseyi.
-